



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 10

Yangia anidakangma :

Tir Yimiyim

tiryimiyim@aolima

tir yimiyim

TAPAK 8

CC Test rankings: Bumrah jenjang tekububai tuogo

Arctic training exercise mapang Russian emergencies minister asü



VOL. XVIII NO. 327 (ADOK 327) DIMAPUR

YANGTEPNÜ (THURSDAY)

RONGJUI (SEPTEMBER) 09, 2021 ₹ 5.00

Centre-i NSCN (K) Niki Sumi den ceasefire alitsü

Dimapur, September 8, 2021 (TYO): Bodbarnü Centre sorkari National Socialist Council of Nagaland (K) Niki Sumi telok den küm ka atema Ceasefire Agreement nung sign sütepogo. Nagaland nung teti atema yimjung bener arutsü alizüing nung Ceasefire Agreement nung sign sütep.

Delhi nung Additional Secretary to the Government of India Piyush Goyal aser Ceasefire Supervisory Board (CFSB) supervisor Nikato Pilot Sumi-i anir NSCN (K) Niki teshimtet

nübotem aser CFSB züingsem Abel Zingru Thuer nungertemi sign asü.

September 8, 2021 nungi September 7, 2022 tashi ceasefire alitsü ta tenangzüktep agiba nung shia lir. Maneni, telok anaprongi Ceasefire Ground Rules sülen anidaksü nangzüktepogo.

"Iba telok nungi züingsem 200 den teimba temai adoker yimjung maparen nung shilem agir aser parnoki prangpong 83 agütsüogo" ta Ministry of Home Affairs-i sangdong ka nung ashi.

Mizo tsür asüba atema SIT tentetsüla: NMA

Dimapur, September 8, 2021 (TYO): Mizo tsür Jones C. Malsawmkimi asüba bushisüingdangtsü atema Special Investigation Team (SIT) ka tentetang ta Naga Mother's Association (NMA)-i Nagaland Governor RN Ravi dang shiogo.

"Mizoram MLA Dr. K. Pachhunga-i India President dangi züluba shidi nung tetsürlai mozü achiba otsü kecha mali ta kuli agütsüogo. Anungji iba jagi police-i 'drugs overdose' ajanga asü ta bushitetba osang

nembangtsür" ta NMA-i Governor RN Ravi dang ashi.

"La tepsetertem ta temolung melemi bilemertemi ashiba nung ajemdaker police-i la asüba kuli agütsübaji tim masü. Anungji tekaratiba nung SIT ka tenteter Jones C. Malsawmkimi dak tashiyim mapa inyakba bushisüingdangtsü akhanger" ta NMA President Abei-Ü Meru aser Joint Secretary Malsawmthangi Leyri nati Nagaland Governor dangi shidi zülü.

SPUNER-i Northeast Bhawan tem den senden amen



SPUNER-i Northeast Bhawan tem den video conference ajanga senden aliba noksa nung angur.

Dimapur, September 8, 2021 (TYO): Bodbarnü Special Police Unit For North Eastern Region (SPUNER)-i Northeast Bhawan tem den video conference ajanga senden ka menogo.

Iba senden nung mendenji Additional Commissioner Police (SPUNER) Special Police unit of North-Eastern Region Delhi Police, Hibu Tamang, IPS liasü.

Bhawan ajak nungi ketdangsürtemi Delhi nung Northeast nung yariba atema Commissioner Police SPUNER-i pelaba metedaksü.

COVID-19 wara mapang SPUNER aser state Bhawan tem tsüingda amalitepa tajung yur mapa inyakba aruba atema Hibu Tamang, IPS-isa pelaba shisem.

"Nanakpura nung SPUNER unit atema ki tasen ka yangludat aser Delhi Police-i Northeast

state balala nungi nisung 1100 shi jungnüa mapa nung aniokogo. Parnokji Northeast nung aliba tesemtem nung mapa lemzüka lir" ta paisa senden nung ashi.

North East Bhawan tem tesüiba küm ka ser tasadang ka shi COVID-19 wara ajanga senden mementeti aru aser iba jagi Bhawan balala tsüingda tesentaktep akangshitsü atema tanü iba senden ayonga menogo.

Iba senden nung Nagaland tenüing nungi Chief Resident Commissioner Joyti Kalash IAS, Additional Chief Secretary Smti. Sarita Yadav IAS, Joint Resident Commissioner Wennyei Konyak aser Dy. Resident Commissioner Nagaland House Delhi nungertem aden, ta Dy. Director, PRO (IPR) Nagaland House, New Delhi Kuolie Mere-i sangdong ka nung ashi.

DPC-i asür Ramnava Sengupta mangayimer

Dimapur, September 8, 2021 (TYO): Taoba mapang Nagaland Post aser Nagaland Today nung osangbener inyaker Ramnava Sengupta tanü Delhi nung asüba osang angashia temolung raksar ta Dimapur

Press Club (DPC)-i metedaksü.

"Asüri toktsür aoba kibong den asükhu lemsateper aser pa tanüla teti anisüingzük ngudakjang ta sarasademtsür" ta DPC-i sangdong ka nung ashi.

NNC nung register süa maliba nurse tem mapa nung manioktsüla

Dimapur, September 08 (TYO): Indian Nursing Council aser State Nursing Council-i recognized mesüra affiliate asüba Nursing schools/institution dak alaka tanga institution balala nung training agiba nurse tembo Nagaland Nursing Council (NNC) nung register asütsü temsüa mali, ta NNC Registrar, Dr. Sentinaro Ao-i sangdong ka ajanga metedaksü.

Item institutions dak alaka tanga institution nung training agiba nurse tem Government of Nagaland/Private hospitals/nursing homes nung mapa mangutsü, ta NNC-i metedaksü.

INC nungi temelaba magii nija institution aikati nursing training agütsüba jangaago aser item ama institution nung training agiba nurse tem aika nija sectors nung nurse inyakdar, ta NNC-i metedaksü. Iba dak sendakba nung NCC-i nija hospitals/

nursing homes aser clinics dang INC-i recognize asüba institutes nung training agia register süa aliba nurse tem dang mapa nung anioktsü atema metedaksüogo.

Nagaland Nursing Council Act 2019 nung Arrla 25 kübok Chapter III ajanga hospital, health institutions, nursing homes, college of nursing mesüra school tem mita oa nurse tem council nung register süa ali-mali mita reprangtsü atema Council nem tashi agüja lir, ta NNC-isa metedaksü.

Nagaland Nursing Act kübok Arrla 29 nung aibelenertem küm 2 tashi tepuokdak ayutsü akok aser senchi achitsü akok, mesüra temerenshi anaprong agütsütsü akok.

Arrla 9 nung yamai shia lir, "Sorkar mesüra nija hospitals, dispensary mesüra infirmary-i Council nung register süa malirtem Nurse/ANM/FHW ama mapa nung anioktsü makok."

Council-i mapang tetemsi nung nija hospitals/schools/institutions/nursing homes mita arutsü, ta NNC-isa metedaksüogo.

Nagaland nung INC-i recognize asüba Nursing Institutes:

1. School of Nursing, Naga Hospital Authority Kohima (GNM course)
2. School of Nursing, District Hospital Dimapur (GNM course)
3. School of Nursing, IMDH Mokokchung (GNM course)
4. ANM School of Nursing, District Hospital Tuensang (ANM course)
5. School of Nursing, CIHSR Dimapur (GNM course)
6. College of Nursing, CIHSR Dimapur (B.Sc. Nursing & Post Basic B.Sc. Nursing)
7. Health Nursing School, Singrijan, Dimapur (ANM & GNM)

COVID-19 Nagaland: 50 dak putet, 48 taneptsü angu & 2 asü

Kohima, September 8, 2021 (TYO): Bodbarnü Nagaland nung nisung 50 COVID-19 dak aser parnok züingsema nisung ajak agi 30,485 kümogo. Külen, tanü COVID-19 puteta alir nisung 2 asüba züingsema tasür 634 kümogo.

"Taoba ghonda 24 tsüingda nisung 50 dak COVID-19 putet. Parnokji Dimapur nung 30, Kohima nung 6, Mokokchung o Phek nung pezüzü (4), Tuensang o Wokha nung anana (2) aser Kiphire o Zunhbeoto nung kaka (1) lir" ta Integrated Disease Surveillance Project atema State Nodal Officer, Dr Nyanthung

Kikon-i ashi. "Kasa mapang COVID-19 puteta alir nisung 48 tashi taneptsü angu. Parnokji Dimapur nung 22, Kohima nung 9, Mon nung 6, Mokokchung nung 5 aser Phek o Tuensang nung asemsem (3) lir" ta paisa ashi.

"Tanü tashi nung nisung 28,226 taneptsü nguogo aser ibaji 92.58% lir. Tang nisung 707 anepaludar" ta Dr Kikon-isa ashi.

Tanü Dimapur aser Kohima nung COVID-19 puteta alir nisung kaka asüba züingsema tasür ajak agi 634 kümogo, ta paisa shisem.

"Mongulbar tashi nung nisung 664,717 nem COVID-19 vaccine

indang dose 896,374 agütsüogo" ta State Immunization Officer, Dr Ritu Thurr-ia ashi.

Vaccine agirtemji frontline workers 60,859, healthcare workers 15,993, arishi küm 45 ser temapur 194,158 aser arishi küm 18 nungi 44 tsüingda alir 393,707 lir, ta paisa ashi.

"Vaccine agirtem rongnungi nisung 231,657-i dose anaprong agiogo. Parnokji frontline workers 44,949, healthcare workers 13,001, arishi küm 45 ser temapur 118,069 aser arishi küm 18 nungi 44 tsüingda alir 55,638 lir" ta Dr Thurr-isa metedaksü.

Advisor Haiying-i Prison dept. ketdangsürtem den senden amen



Advisor H Haiying, DG Prisons Rupin Sharma & ketdangsürtem den külemi tangokba noksa nung angur.

Kohima, September 8, 2021 (TYO): Jails and Printing & Stationery Advisor, H. Haiying-i Bodbarnü prison department den joint coordination meeting (JCM) ka menogo.

Iba senden nung Nagaland nung jail 11 aser prison headquarters nungi Director General of Prison, Home Guards & Civil Defence and State Disaster Response Force, Rupin Sharm-i anir ketdangsürtem aden.

"Prison department nung

ketdangsürtemi corona virus anema rara nung shilem tajung agiba aser tepuokdak yua alirtem tasüba majurudaktsüba atema kanga pelar" ta Advisor Haiying-i tanü senden nung ashi.

"Prison department-i sorkar aser loktiliba atema mapa tajung inyaker. Department nung ketdangsürtem aser staff temi tepuokdak ayurtem taküm metongshitsür aser ya loktiliba atema mapa tajung ka lir" ta paisa ashi.

Tanü senden nung

ketdangsürtem aser staff temi Nagaland nung jail tajungba kümdaktsütsü atema tebilembatem lemsatep.

"Loktiliba nung jail ya emergency services ka lir aser iba ya kodanga meshibangtetsü. Anungji Nagaland nung jail tem jenjang tajungba kümdaktsütsü nungdaker" ta DG Rupin Sharma-ia ashi.

Advisor Haiying-i tebilembatem sorkar aser tanga department tem dangi abentsü nangzük.

Mkg nung 'Physio Ki' ta sür physiotherapy clinic ka lapokogo



MTBA Assoc. Pastor Sentimeren (abelen nungi 4buba)-i Arkong Ward nung "Physio Ki" meshiteta lapoktsür külen Physio Ki clinic lapokla physiotherapist Dr. Olemjungla (achichi nungi 4buba) den sentong nung adener kar noksa nung angur. Mokochung, 8th September, 2021

Mokochung, 08 September (TYO): Sept 8 ya "World Physiotherapy Day" lir. Iba anogo amungba den külemi Mokochung nurburtem asoshi osang tajung kaji Arkong Ward kübok Nepali Baptist Church anasa 'Physio Ki (Your Home to Recovery)' ta sür physiotherapy clinic tajung ka Mokochung Town Baptist Arogo (MTBA) Associate Pastor, Sentimeren ajanga meshiteta sarasademer lapoktsüogogo.

Tanü asen lanurtem zünger mapa mengui alir aika lir, saka physiotherapist Dr. Olemjungla PT-i India len zünger bendang tesem balala nung inyaka lir, pei taso limai arua pei nübun tenzüktü tejangraba nung iba mapa tenzüktü asoshi pelaba den iba tesem ya nübun taneptsü anguba tesem ka südaksütsü asoshi Tsüngrem akhüm tsübua tajungtiba nung achayanga aotsü asoshi Assoc. Pastor Senti-i moatsü.

Dr. Olemjungla PT-i mapang tatsüka agidang, Mokochung

nung physiotherapy clinic kanga apara, anungji, nübuntemi physiotherapy clinic nungdakba repringteta aser anema aliba tsütsü (healthcare facilities) service tajungtiba agütsütsü nükjidong yur iba clinic ya tenzüker, ta ashi.

Iba "physio ki" nung ya treatment agibaji ajaki agütsüetba (affordable) jenjang dang agitsü, rehabilitation service, tantsür tambur akümdang ngoya-ngoshi tapu balala, stroke patients-tem repringtsü. Physiotherapy tapu balala atema machine teperi bener arua amenoka lir. Jangratemtsükaji; tantsür tambur küm 60 tema pur atemabo 'consultation fee' magitsü aser ano treatment mapang talang agirtem atemabo sen tajemba agitsü, ta Physio Ki lapokla Dr. Ajunglai iba osangbener den jembidang lemsatop.

Iba clinic ya 9th September, 2021 nungi tenzüktü aser Deobar dak alaka anogoshi anepdang 9:00 ako nungi nikong

5:00 ako tashi lapoktsü.

Changtongya tsür Dr. Olemjungla PT ya West Bengal nung azüng. La züngtemer külen Fortis Memorial Research Institute Gurgaon, health care at home Delhi nung inyak. Aji sür, Qatar nung küm ana shi liasü aser yang nung jagi pei limai sodi aruba alima tensa tia mesüngjemba ajanga meyipa moteti liasü, iba mapang Mokochung nunga ibala clinic nungdakba ajiteta Physio ki lapoktsü telemetba agi, ta laisa shisem.

Temang ajetshiba (massage) o physiotherapy ana ya balala lir, kopiras-i temang ajetshitsür saka physiotherapist-i arakzüba (movement) aser exercise amala treatment agütsür, anungji, nübuntemi iba tetsünda anaji metettsü nungdaker, ta laisa jangjashitsü.

Physio ki indang kari danga osang tejangjaba metetnüra iba mobile number (8787300847)/physioki21@gmail.com ajanga tongtepratep sütettsü.

AH & Veterinary Services Dept. ajanga metetdaksür

Dimapur, Rongjui/Sept. 08 (TYO): Meluri Sub division, Phek District kübok Kangjan yimtsüng nung mejangjaba tashidak agi ajungbena jang aika asüba osang angashia Department nungi technical team ka iba tesem yagi September 7, 2021 nü ogo aser preliminary survey/ bushisüngdang süa kongshia aliba shiruru anepalua liasü, ta Directorate of Animal Husbandry & Veterinary Services ajanga sangdong ka

nung ashi.

Pasteurella multocida ta ajaba bacteria kati Haemorrhagic Septicaemia (HS) adokdakja jang ya asüba südi, ta clinical symptoms ajanga ajitet.

Ajisüaka laboratory nung tendangba sülen ang tali tejangjaba metettsü. Iba osang tejangja mangu tashi nübuntem aser kiset shiruru kiburtem kumdanga aser ajungbena shiruru asüba mita atar anasatiba Veterinary Institute

nem osang agütsütsü metetdaksü.

Mapang shidak nung tashidak azüoktsü aser sentong balala yanglutsü atema tim ketdangtsür, AH & Veterinary Services Department nem iba amala osang agütsütsü ya kanga tongtipang lir, ta ashi.

Maneni kiset shiruru metsürtem dang shiruru tasü machitsü mesüra tepok melapoktsü saka Department Officers den osang agitepa aremetsü ayongzüka liasü.



State Council of Educational Research and Training ajanga Directorate of School Education kübok State Centre of Nagaland Languages indang ketdangtsür den lungjemer Nagaland heritage studies indang workshop ka anogo ana agia liasü. Iba sentong ya SCERT Conference Room nung September 7-8, 2021 anogotem nung Class 1 nungi 8 tashi curriculum ya tang recognise süa aliba oshi balala 18 nung meyipzüktü indang sayua liasü. Iba workshop nung Directorate of School Education nungi ketdangtsür 41 den shisalen sayur nisung 7 arua shilem agia liasü.

NCC Directorate of North East Region indang ADG tasen shimoggo

Dimapur, Rongjui/Sept. 08 (TYO): Major General Bhaskar Kalita, Yudh Seva Medal ajanga September 6, 2021 nü Additional Director General, National Cadet Corps (NCC) Directorate of North East Region mapa agizükoggo, ta sangdong ka ajanga ashi.

General Officer ya Sainik School Goalpara, Assam nung azüng aser National Defence Academy, Pune aser Indian Military Academy, IMA Dehradun nunga zünga liasü.

Pa ya 19 Kumaon nung June 1985 nung commission asü. Major General Bhaskar Kalita ya tongtipang regimental, command aser staff mapa aika inyakdanga lir, ta ashi.

Pa ya Commanding Officer 19 Kumaon, Commander 11 Mountain Brigade, Deputy Director General (DDG) Weapons & Equipment (WE) Contract Negotiation Committee (CNC), Integrated Head Quarter (IHQ) of Ministry of Defence (Army), General Officer Commanding (GOC) 56 Infantry Division aser General Officer Commanding (GOC) Uttarakhand Sub Area menden nung mena aliba nübu ka lir, ta



Major General Bhaskar Kalita

sangdong ajanga ashi.

Pa ya Head Quarter Integrated Defence Staff (IDS) nunga Chief Project Co-ordinator (CPC) ka ama National War Memorial aser National War Museum mapa tulu inyakba nung tongti shilem agia liasü.

General Officer nem 2010 küm Chief of Army Staff's (COAS) commendation card sempet agüja liasü aser 2014 küm Yudh Seva Medal (YSM) agütsü.

Major General Bhaskar Kalita ya Assam nungi alitsü, ta sangdong ajangasa ashi.

Longleng nung "Coffee & Chill" coffee bar ka lapokogo

Dimapur, Rongjui/Sept. 08 (TYO): District Project Officer, Land Resources Department, Longleng lenisüba kübok India nung nujiso ngur küm 75 ajungba nungtem (Azadi Ka Amrit Mahotsav) nung "Coffee & Chill" nungja agütsür coffee bar "Drink What You Grow" omen nung ajemdaker Omega Lodge, Longleng nung September 8, 2021 nü semzüka liasü.

Iba sentong nung alakteta semdang ka ama ADC Longleng, D. Robin-i jembiba mapang, Department of Land Resources dang telaba lemsatop aser DPO Longleng ajanga meranga inyakba atema tenüngsang agüja liasü.

Pai nübuntem dang azünga aliba mapang iba coffee bar ya semdanga district nung züsentetba coffee jemdangtsü ajungshia liasü.

Nübuntem ajangzüktü atema ketdangtsür ajunga külemi inyaktsüla, anungjidang tarutsü anogotem nunga iba amala

sentong ya ayongzüktettsü aser tarutsü tia melenshitsü, ta Robin-i ashi.

District Project Officer, (LRD) Longleng, Kughalu Chishi-i ibai sentong balaka lir aser Longleng district nung wadang tasen ka lir, ta ashi.

Department sentong nung bendang limai yoktsü atema, local entrepreneur ajungkettsü aser state nung coffee ajemba yimya sübatsü atema coffee tsünütsü ajungmesotsü dena lir, ta pai ashi.

Longleng nung coffee yangluba osettem lir aser department ajanga coffee tsünütsü ajungmesor aser tanü tashinung coffee ya ali tasazük hectares 380 nung yoka lir.

Tarutsü nung Longleng district nung coffee tajungba aser timba angutsü teimla lir, ta pai ashi.

Iba sentong ya Chingnyei, LDA (LRD) Longleng lenisüba kübok agi aser Phamphen Phom ajanga melepzung o jembia liasü.

AHODs aser HODs pur senden ka Sept. 10 nü amentsü

Dimapur, Rongjui/Sept. 08 (TYO): Administrative Heads of Departments aser Heads of Departments indang senden ka September 10, 2021 anüngdang 1:00 ako nungi tenzüka Secretariat Conference Hall, Kohima nung amentsü, ta sangdong ka ajanga ashi.

Iba senden nung jembitsü onüktem yamai alitsü:

1. CAG Audit Report- All AHODs
2. Pending Advertisement Bills- IPR Department
3. Updation of Departmental

websites- All AHODs

4. Department aser directorate balalai full time yimya mesüra 'terms and conditions' balala nung shimba legal advisors/ consultants/retainership - Justice & Law Department
5. Taoba senden nung jembiba/ action points- All AHODs
6. Menden nungi temelaba agir danga onüktema jembitsü akok.

AHODs/HODs tem dang pei department indang nung item onük ya repringshimer arua adentsü metetdaksüoggo.

Assam CM Sarma-i 'mobile vaccine vans' sayatsü



Assam CM Sarma-i 'mobile vaccine vans' sayatsüdang tangokba noksa nung angur.

Guwahati, September 8, 2021 (Agencies): Bodbarnü Assam Chief Minister Himanta Biswa Sarma-i Rupnath Brahma Inter-State Bus Terminal (ISBT) Betkuchi nung vaccination centre ka lapoktsüogo. Iba ya inter-state aser inter-district travel passenger tem nem vaccine agütsütsü atema lir. Tanü Chief Minister Sarma den Health department

ketdangsürtemi district 6 atema mobile vaccine vans 15 sayatsü. Assam Health Minister, Keshab Mahanta aser Minister for Housing and Urban Affairs Ashok Singhal na lia CM Sarma-i mobile vaccine vans sayatsü. "Tang ya Assam nung COVID-19 anema raraba tongti mapang ka lir, anungji vaccine agütsüba kanga tongtipang kümogo" ta CM Himanta Biswa

Sarma-i ashi. Taoba ghonda 24 tsündga Assam nung nisung 471 dak COVID-19 aliba putetogo aser parnok züngsema nisung ajak agi 5,93,087 kümogo. Tang tashi nung COVID-19 puteta alir nisung 5719 süogo aser tang nisung 5110 anepaludar. COVID-19 puteter nisung 5,93,087 nungi 5,80,991 taneptsü nguogo.

Brahmaputra nung rong ana tsüktep; Nisung 50 shi samar bushiteper

Guwahati, September 8, 2021 (Agencies): Jorhat district kübok Nimati Ghat nung Bodbar nikonngang Brahmaputra ayong nung rong ana tsüktep. Iba mapang Nimati Ghat anasa nisung 100 tema mena aliba machine boat ka tzü nung mekupok. Rongji Majuli district nung Kamalabari Ghat-i aodang lendongji atalok. Tanü nikonngang 4:00 ako meta Brahmaputra ayong nung Maa Kamala ta ajaba rong aser Tipkai rong tsüktep. "Iba lendong atalokba osang angashia temolung raksar aser ni Majuli aser Jorhat district administration tem dang yariteptsü tetuyuba agütsüogo" ta Assam chief minister Himanta Biswa Sarma-i ashi. "State Disaster Response Force (SDRF) aser National Disaster Response Force (NDRF) teyari agia yariteptsü ni shiogo" ta pai metetdaksü. CM Sarma-isa minister

Bimal Bora dang lendong atalokdaki aotsü tetuyuba agütsü. "Ni minister Bimal Bora dang iba tesem tonga aotsü shiogo. Asüng ni Nimati Ghat semdangtsü" ta pai ashi. Külen, Union Home Minister Amit Shah aser Union Shipping & Ports Minister Sarbananda Sonowal naprongi chief minister Sarma den iba osang metetpelaogo. "Centre sorkari akokba tashi yaritsü shiogo. Amit Shah dang kanga pelar" ta Sarma-i ashi. "Majuli nung rong lendong atalokba osang angashia temolung raksar. Ni Assam CM den jembiogo aser pai rescue & relief operations inyakba osang kü dang shiogo" ta Union minister Sarbananda Sonowal-ia metetdaksü. "Iba lendong nung adenertem ajak yaritsü atema ni ozü ministry dang shiogo" ta Sonowal-isa metetdaksü. Prime Minister Narendra

Modi-ia Nimati Ghat anasa rong lendong atalokba osang angashia temolung raksaba osang metetdaksüogo. "Assam nung rong lendong atalokba atema jashir. Akokba tashi passenger tem kümzüksü merangdar. Nisung ajak lendong nungi kümzüksü atema ni sarasademtsür" ta Prime Minister Modi-i Twitter nung ashi. Rong nung mena alir nisung 50 shi Brahmaputra ayong nung arakseter asütsü ama temolung melemi bilemer ta osang angzükter. "Maa Kamala rong ji nikonngang 4:00 ako meta Nimatighat toktsür aotsüba liasü, saka Tipkai rong ghat-i aruba ajanga lendongji atalok" ta tenük kuli angur kati ashi. Iba rong nung motorcycle 30 shi bena liasü. Lendong atalokba sülen State Disaster Response Force (SDRF) aser National Disaster Response Force (NDRF)-i yaritepdar.

Molungnen o



Tasoba 13.05.1937

Tasüba: 27.08.2021

Kodanga amatsü makokba ozü temeim tsürabur **WT. MARNENLA** (Chuchu Town) shirangba mapang nungi akümüli toktsür onok mangyim tejashi nung aliba mapang kija, kibong, lokti aser arogo nungi shirnokisa ozü dang meima nübu, rongsen, shisatsü aser sarasadem agi nungita yariogo, nenok ajak dang onoki kanga pelaba metetdaksür.

Onoki nenok tsüנגdang arua pelaba meshitetba atema kanga sasar, aji saka asen takarsang Tsüנגremi nenok temeim mapa asoshi talubusa moajangma ta ozü sarasadem. - Temeim Chirnurtem, Semchirtem aser Kinungertem.

Silchar aser Bairabi tsüנגda passenger train senzütsü

Guwahati, September 8, 2021 (Agencies): Tan hopta nungi Assam kübok Silchar aser Mizoram kübok Bairabi tsüנגda passenger train service tenzüksü. Iba osang ya Northeast Frontier Railways (NFR)-i metetdaksü. Silchar aser Bairabi tsüנגda senzüba passenger train ya bi-weekly service ka lir. September 10, 2021 nungi jila

ana tsüנגda train services tenzüksü, ta NFR-i ashi. "Northeast Frontier Railway-i tan hopta nungi Silchar aser Bairabi tsüנגda passenger special train senzütsü telemtetba agiogo" ta parnoki sangdong ka nung metetdaksü. "Mongulbar o Hokolbar anogotem Silchar nungi train apusotsü aser Bodbar o Honibar anogotem Bairabi nungi apusotsü" ta NFR-i ashi.

Assam innovator-i 'interlocking building block machine' atema patent angu



North Lakhimpur, September 8, 2021 (Agencies): Assam kübok North Lakhimpur nungi innovator kati 'interlocking building blocks' yangluba machine yanglutetba atema patent nguogo. Intellectual Property India, Government of India-i innovator Umesh Chandra Sarma nem patent agütsü. Sarma-i 2015 küm patent atema temelaba meshia liasü aser tang pa nem "An Apparatus for Manufacturing an Interlocking Building Blocks and Methods Thereof" ta ser patent agütsüogo.

Umesh Chandra Sarma-i 1999 nung building block purapiteta yanglu aser iba mapang nungi pai iba machine tajungba küma yanglushia arur. 2014 küm nungi National Innovation Foundation-Ahmedabad-i iba machine repranga aru. 2009 aser 2015 kümtem India President-i Sarma nem anaben tashi sempet agüja liasü. "Interlocking building block manufacturing machine ajanga eco-friendly blocks yangluteter. Iba ajanga ki yangludang senotsü kümzükter aser kasa mapang air pollution nungi jenbur" ta Sarma-i ashi.

**GOVERNMENT OF NAGALAND
DIRECTORATE OF SCHOOL EDUCATION
NAGALAND : KOHIMA
PRESS RELEASE**

Dated, Kohima the, 1st Sept.' 2021

NO.ED.EL/ADV/EXAM/2021:: In continuation to this office advertisement of even Dated, Kohima the 10th July 2021 and in compliance to the Hon'ble Gauhati Court Kohima Bench Court Order in Writ Petition (c) NO.16(k)2018, Dated Kohima the 17th march 2020, for advertisement of one (1) Primary Teacher post at GPS Phiro Village -B under the establishment of the Sr. Sub-Divisional Education Officer, Wokha. The following information are given to the candidates who had applied for the same.

1. There shall be both Written Examination consisting of 100 (Hundred) marks and viva voice of 15 (Fifteen) marks.
2. The Syllabus for Written Examination shall consist of:
 - (a) General English-30 marks.
 - (b) General Knowledge-30 marks.
 - (c) Professional course-40 marks.
3. Date of Examination : 25th September, 2021.
Venue: Directorate of School Education, Nagaland, Kohima.
Time : 10.00 (a.m) to 12.00 (noon).
4. The Candidates are requested to collect their Admit Card personally on 24th September, 2021 during office working hour.
5. Henceforth, no separate calling letters will be issued to the candidates.

**(SHANAVAS C) IAS
PRINCIPAL DIRECTOR**

Mizoram nung nisung 1,214 dak Covid-19 putet

Aizawl, September 8, 2021 (Agencies): Bodbarnü Mizoram nung nisung 1,214 dak Covid-19 aliba putet. Parnok züngsema nisung ajak agi 66,910 kümogo. Tang tashi nung nisung 54,697 taneptsü nguogo, 11,986 anepaludar aser 227 süogo, ta health ketdangsür kati ashi. Tanü nisung 1,214 dak putetba nung tanur 229 dena lir. Parnok rongnungi nisung 5

tangaleni orr aruba shiogo aser tanüngba nisung 1,209 ji state nung dang menaba lir, ta ketdangsürisa metetdaksü. Mizoram nung COVID-19 alitsü akok ta temolung melemi bilemba sample lakh 9.28 shi tendangogo. "Mongulbar tashi nung nisung lakh 6.60 tema nem vaccine agütsüogo" ta state immunisation officer Dr. Lalzawmi-ia metetdaksü.



TIR YIMYIM

YIMOBILEM (EDITORIAL)

DIMAPUR YANGTEPNÜ, RONGJUI(SEPTMBER) 09, 2021

Sarusachi tenzüker

Tan September ita hopta ka tsüngda Dimapur nung Naga nung linük tenzükerkem telok balala tenü nung sarusachir nisung ti tashi Dimapur police-i apuba osangji Nagaland nung alir ajak asoshi shisabolutsüka lir. Iba jagi Dimapur aser temeket nung alir yimtsüngtemia Naga nung yimten nüchiso bushir ajak longjemer Naga government ka maküm tashi, Naga yimten tenü nung saruba sarusachi kecha magütsütsü ta nenshia metetdaksüogo. Naga nung yimten nüchiso bushir teloktem ka küma longjemer government ka maküm tashi linük saru kecha magütsütsü ta letetba ya 2013 küm October 31 nü ACAUT teloki Dimapur nung ayongzükba lokti senden telok ka nung renemba lokti pangzüng ka lir. Iba telemtetba ya Naga kin ajaki agizüka beshitsü meranger. Atangji, Naga government ka maküm tashi Naga nung linük saru kecha magütsütsü ta letetba nukjidongji saru magütsünüba kisung masü, saka Naga yimten nüchiso bushir Naga nung telok paikaya lemsar aliba ya kechisüdirsüaka ka küma longjemdaksüner. Iba tangatetbaji shitak dang lir, kechiyong tang amai Naga yimten nüchiso bushir telok tenet ti küma lemsar alir telok shia jagi kilen shia mesüra dokan shia saru sarua arunungbo kecha agia matitsü aser agütsübjaja teindok amai dang asütsü. Atangji, tangbo Naga nung linük tenzükerkem telok ka küma melongjemtetaka, parnoka pei pei akok jembia India den yimjung nung lir. Tetezü, akhidang amato prangpong injang amshia raraba agi Naga yimten tebilemstü letettsü makoktsü ta Naga nung o India government na pronglai angateta lir. Atangji, tang ama yimjung mapangbo Naga yimten nüchiso bushir asoshi teinyaktsü mapa maka ta masü, saka yimjung aliba mapang tajung ya alangzüka tesem tesem nung nübortem ajurua Naga yimten temeten indang jembitsüla aser tangatetba tajung agütsütsüla, Ajisüaka, tia majung kaji India den yimjung nung alir Naga yimten nüchiso bushirtemji India government-i lemzüksüba tesem ka (designated camp) nung amonger, anungji iba nung jagi temelaba magii mashimashilen jajatsü makoker. Ibaji jungjunga bilemdangra, kidang puoka ayu (house arrest) amai lir. Ibaji asenoki angatet nungbo kidang talangka puoka meyudaktsü telemtetba kati arutettsü. Atangji, kidang puoka ayuyonga mayuyonga chibosa chiyongtsüla aser karbo yimten nungdaka jajatsüla, anungji senbo nungdaksü, anungji iba senji kechi saru nungi bendentsü ta asübjaji yimten telok ajak asoshi tebilemstü tulu lir. Iba jagi saru sarutsüla adoker. Atangji, taoba anogo ishika tsüngda Dimapur police-temi apurtemji shitakba linük tenzükerkem telok asoshi sarur asü mesüra telok tenü amshia parnok agitsü saruar ashitsü makok, saka Naga yimten telatetba ka dangi maru tashibo Naga yimten nüchiso bushir telok tenü nung sarusachi manentsü. Naga yimten nüchiso bushir telok paikaya taküm aliba ya, asenoki agütsünü magütsünü ta masü, saka parnok ajak Nagaland nung shishilembartem dang nungi saru saruba agi taküm alir. Ano, Naga nung asoshi tekümdangtsü kaji Naga yimten nüchiso telok tenü nung tsümartemi saru sarutsü. Ibaji asenok asoshi dang masü saka tsümartem asoshia lendong lir. Item tsümartem jagi Naga yimten telok tenü nung saru sarutsüba sen teimbaka parnok agir aser iba sen jagi pei lima nung oagi kiojen yanglua takar akümba otsü lir. Ashiko, joko karbo yimya sübaba agi Naga yimten tebilemstü agi temoatsü küma saru saruba kisung agi takar küma alitsüa akok. Item jagibo Naga yimten tebilemstü ya kodanga tatembang kati marudaktsünütsü. Ajisüaka, Naga yimten nüchiso bushir teloktem nung tanishirtemi angatettsüba kaji, Naga lima nung tang amai yimten nüchiso bushiba sentongtem kecha mali, saru dang sarua taküm alitsü merangra, nübortemi ola adoktsü. Idangjibo India tsüngdang asenok ajak maksü ajurutsü aser külemi akoksatsü. Iba ama tensa ka majurudang aser nisung ajak telok ka mesüra ka tenü amer saru sarur makümdang, tanüa tanü akok, Naga yimten tebilemstü ya telatetba kati arutsüla.

OLEMSABANG

AOR AJAKI AO OSHI ASHITSÜLA

~ Temsüwati Kichu (Osang zülur)

(Yashi adok nungi...)

Mulungdangtsü shitakba kuli kar yamai

1. Kibong ka nung tebuji France kinungtsüji Aotsür Zürich nung alir. Par jabaso ana, tenati Ao jembir. Parnok denji Aor tangarbo shinga malisür nung yamaji jembitetter. Koda jangratemsü!
2. Aotsür ka UP nung ka den kibong aküm, Agra anasa alir. Aorbo toktsür Naga nung shinga yangji mali. Yangji tanurtem ajak inet, saka tanurtemi mongsen o, jungli o kanga junga jembir. WhatsApp message nunga Ao o zülutetter.
3. Tanuri tetsü den aser yimer den mongsen o agi jembia aser tebu den par oshi agi jembia. Tanur tebuji Karbi nung parji Diphu nung alir. Tanurji yangji soa inet aser tain akümdang South India nung azüng.
4. Kinungbu kinungtsü ka jungli aser ka mongsen, Naga lima nung khen danga melidang saka par tanur ajaki jungli mongsen anaprongla jembitetter züngtetter. English, Hindi aser tanga oshibo tanuri angazüksü saka tetsü oshibo kidang mejembira tangazüksü tasak. Parbo tanurtem school nunga third languageji Ao agidaktsür.
5. HSLC nung Nepalitsür kati Ao Subject nung distinction angu.
6. Kinungbu kinungtsü anaprongla Aor, yima kadang saka parbo tsürabur dak alaka tanurtemi Ao o mashi. Pei yimdaki arudang pei tetsü-tebou, yimeryimsanger den Nagamese agi jembir. Tansütsü!

Ao oshi renloka aotsü asoshi teinyaktsü kar yamai

1. Zülumen ano memedem aika nung lir. Züludang aikati shitak mezülur. Saka shitak mezülutetterji ta sür mezülui malitsüla. Zülua zülua tajungba züluteta akümtsü. Talisa Ao Laishiba, Arok Osep, ASLB-i adokba Ao Oshi Tensenyim, item nung jagi zülumen angazüksüla. Ao oshi zülumen shitak metettsüba ya kanga tongtipang. Kechiaser koba oshi nung zülumen pei zülunütsü agi züluteper iba oshi jagi tangar kodanga memeneptsü.
2. ABAM aser ASLB külemi zülumen liromedema aotsü asoshi sentong kar ayongtsüla. Tenzüker, tezülur, editorial board Arogotem nungi, ano osangkaket zülurtem, tejangrartem, item ajakya talisa zülumen nungji liromedem kati arutettsüa tekara nung sentong kar agitsüla.
3. Kidang kibong nung tanurtemi Ao Laishiba züngdaksütsüla. Kibong tekülem agidang Ao Laishiba, Ao o nung aliba anogoshia azüngba tanela chiyungtsü, item azüngba nung aser Ao ken atenba nung tanurtemi shilem agidaktsütsüla. Tanur asüdang azüngba agi Ao o züngteta akümer, kanga tajangzük angur.
4. Ao oshi nung tetoktepba balala maneni alitsüla. Ken mejema atenba, sangro yangluba, kaket züluba, zülumen, a.a. item nungya tetoktepba aliba ajanga oshi kanga renloktsü. Arogo nung Laishiba züngmar nem sempet agütsüba ya kanga junger, iba nungya lanurtemi aikati shilem kanga agitsüla.
5. Pei oshi ashiba ajanga tajangzük kechisa lir, item ya lanur nem metetdakja pei oshi angazükdaktsütsü kanga ajungshitsüla, koda asünung parnoki jangratsü item lemangtemji bushitsüla. Pei lima nung mapa bushidang mapa kar nungbo mapai aitsü asoshi pei oshi ashitsüla ta asüba yaa joko nungdakba ka kümadokogo, anungji mapa kar atemabo pei oshi ashiba jagia pei lima nung mapa angutsü nung yarir. Ano pei oshi ashiba ajanga ajangzüktem parnok dang shia jangradaktsütsüla. Idangjiang parnoki temulung agütsütsü.
6. Tila tanurtemi Ao oshi jangradaktsütsü asoshi jangratemtsüka, tepuoatsüka, tanuri aginüba ama kentenmenü, nursery rhymes, oshi basics, yamala cartoon/animation/video yanglua sayutsüla. Idangji jangraa melamela angazüksü.
7. Kar atemabo tanurtem school sodi mapang yimdaki anir oa idakji alirtem den jembia mongdaktsüba ajanga oshi angazüksü.
8. Sunday School aser Impur Bible School, item nung ya Ao o agi sayuba ajanga oshia angazüker. Anungji item nung ya temulung agütsütsüla.
9. Ao Theological Association-i/telok kari/kijai asüyonga talisa Ao kaket Publishing House ka tenzüksüla. Kechiyong tezüluri meranga zülüka talir, tazünger aser yoktsür melira mezülunetsü. Publisher aliba ajanga kaket adoktsü kangarabo tezülur atema khuret masütsü. Kodang kaket adoktsür aser yoktsür tajung lidir, idangji meimlaba shisashir nungi kaket tajung aika adoktetsü. Ano karibo Ao kaket ebook atema website lapoktsüla, ano kaketjia online nung alitettsüa inyaktsüla.
10. Arogo kar dak alaka aika nung küm nung khen anaban Arogo osang kaket adoker, iba nungya department balala osangtem teimba. Saka Ao oshi nung ocet zülua, bendena, adoktsüla.
11. "Arok Osep" ya ano ojang teimba enoka tanaben adoktsüla.
12. Laishir Sangdong, Laishir Ola, Lanur Teimla, Khristan Kibong, ABAM Osang, Mitkar, kar anenogo kar anarongtena adokdar. Tiryimyim, Ao Milen, Lenjeter adokdar. Ao kaket azünger kanga ajema kümogo, Aori kaket alia azüngtsü mejangrar. Tazünger melira tezülur malir. Anungji, Ao oshi kakettem azüngtsü ajungshitsüla.
13. ASLB-i Ao oshi nung B.A(Diploma) aser M.A.Post GraduateDiploma (PGD) Arangtet tatitang ajanga agütsüdar. Mokokchung District nung school ajak nung Ao oshi ya compulsory süa agidaktsütsü ASLB-i ajungshia arudar, ASLB-i inyakba ajanga FAC nung B.A. nung Ao subject (optional) agidar, universitylevel nung M.A. tashi atutsü sentong lir, item maparen takok angutsü asoshi ajaki nungittsüla. ASLB dang kanga peladi.
14. Tir Yimyim YouTube aser Instagram ajanga Ao oshi renloktdaktsütsü asoshi inyaker. Anogoshia Ao ojang anana tetezü den English nung meyipier Tir Yimyim Instagram nung angutsü. Aji lapoka angazüksüla. Ano kari akok nungbo Ao o app kar yanglua, mesüra google translation Ao o nung sütettsüa inyak nungbo aika asoshi Ao oshi angazüksü lemang tajung lapoktsütsü. Anungji Internet amshia Ao oshi renloktsüasoshi inyaktsüla.
15. Alima nung oshi ka recognize asütsü atema zülutetba dang nungibo kwikati jembir aji tongtipangba asadanger. Oshi ka renlokbaji züluba dang nungibo jembiba agi tekara renloker. Anungji Aori asüyong tangar kini asüyonga Ao o junga mejembitet dang memenuitsü ajungshia sapua jembidaktsütsüla.
16. Asenok Aor oshi nung renloka odi ta süra, asenok tsüngda aremzükteptsüla, pi dang nungi angazükntsüla, pei shisangren shisatsü entoktsüla, tenükmeren malitsüla, longjemtsüla.
Ao oshi ya Ao kin ayak. Anungji Ao oshi wazüka ayutsüla, renloktsüla, Aorbo ajaki pei oshi ashitsüla. Aji kong angazüksü, kechi nungi jembia tenzüksü? Pei kibong nungi, atepzüng nungi tenzüksüla.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

OLONG PAITEP # 5931

	1		2						3
4					5		6		
7									
			8						9
10								11	
							12		
13								14	
15									

TIPLIN		LANGTSÜNGLEN	
1. Taochi sayuba	- 10	1. Menungra	- 6
4. Temezüng agi kongshi	- 4	2. Mi tsükloker mesepba	- 4
5. Ainer	- 6	3. Süngo o tzü ajemba	- 5
7. Chiyungnü	- 3	5. Temenemsü tajung	- 7
8. Mi nung atsük	- 5	6. Idak	- 4
11. Asen masü	- 3	8. _ _ _ _ ok	- 4
13. Lenmang ajurutepdak	- 6	9. Tebangi apuba kongki tapu ka	- 6
14. Yangi masü	- 4	10. Tashi endokba metet	- 5
15. _ _ _ _ _ jang	- 6	12. Tzü manung senzüba	- 4

OLONG PAITEP # 5930 TELANGZÜBA

TIPLIN :		LANGTSÜNGLEN :	
1. Rebeka, 4. Adam, 6. Yohan,		2. Kan, 3. IM, 5. Anüng, 7. Amsü,	
9. Zü, 12. Sayutsüngir, 15. Ku,		8. Yosep, 10. Sara, 11. Isak, 13. Yakob,	
16. Naman, 17. Abel, 18. Samuel.		14. Nana, 16. Noa, 17. Am.	



LANUR ASOSHI BILEMBA LENIR MLA ALOKBA PAR GOVT MEETING NUNG JEMBIR

MLA Alokba : Yangi tongti minister pelokbai anir külem MLA tajungtem asen kidanger state lanurtemi tokyo Olympic i oa takok ngur arur nem par state govt i parnok lanur ajungmesotsü asoshi takok ngur arur nem state govt nung mapa tajung agütsüogo anungji Olympic nung mesüaka asen naga lanur ana asem agi International level nungi takok ngur arua lir parnok nem asen govt ia mapa agütsütsü ni penok danger

Minister pelokba : MLA Alokba na aji kechi sayatenyar aser kechi jembir?

MLA Alokba : Wa.. Sir pelokba asen naga lanur ajungshia tang takok ngur arur nem mapa tajung agütsüra tarutsü nung lanur tajung aika adoktsü aser asenok nem konang bener arutsütsü

Minister pelokba : Alok tekora na sowar ama o tejembima aseni dang takok angur lanur kar nem mapa agütsüra asüng yanü takok angur lanur aika adoktsü süra asenoksa akoksatsü

MLA Alokba : Wa.. Ano kechi nung akoksatsü?

Minister pelokba : Asen kinunger aser adianutem backdoor appointment asütsü mapa madoktsü

MLA Alokba : Masüaja sir nai tai angateta Nagaland Dimapur state stadium merenemteti arem agi sakpanger aliba nungji tzülu ayimtsü mapa agütsüdi ta ashirba jaa...

Minister pelokba : OH Alokba!!!

Lilir.. I L Lkr

AO OSHI ANGAZÜKDAK:
TANÜ ANGAZÜKTSÜBA OJANG

Küdong
(n) kü meimla/ meimsang (girl/boy friend)
* **Küdong** küna külemi sentepi ao.

Küla
(n) tzü aser yi ajemtsü au agi yangluba (bamboo mug)
* Akhidang limapurtemi **küla** nung yi züoker ajem.

Tepela Tasoba Anogo

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimiyim bureau tem nung agüjang.

1. Tenüng :

2. Tasoba anogo:

3. Küm : 4. Class :

5. School :

6. Talidak :

7. Salem osang :



TANÜBO NAI LANGZÜANG

Q. 'Patrakar Kalyan Kosh' ta asüba ya osangbenertem atema mapatong ka lir, süra iba ya koba state nung amenloka lir ?

[A] Uttar Pradesh [B] Maharashtra
[C] Haryana [D] Chhattisgarh

(Taruba adok nung onoki langzüsü)

YASHI ADOK TELANGZÜBA : 2010

SUDOKU # 5972					TELANGZUBA # 5971												
2			4	5		8		2	7	8	4	9	3	6	5	1	
		9		6			4	3	6	1	4	8	5	7	3	2	9
7								1	5	9	3	2	1	6	4	8	7
5						3			8	4	6	9	7	2	5	1	3
1		7	8		9	6			1	2	9	5	3	4	8	7	6
		8			2				3	5	7	1	6	8	9	4	2
3	7		1				5	6	9	3	1	7	4	5	2	6	8
				2	8	4		9	4	6	2	3	8	1	7	9	5
4		8			5	1		2	7	8	5	6	2	9	1	3	4

OJANG LUTEP # 5517

IBNAO : [][][][][]

TUNAJG : [][][][][][]

ILEBMA : [][][][][]

PIYOJEMNGA : [][][][][][][][][]

TILOKI : [][][][][]

AUH : [][]

SÜMA : [][][]

NGBNUO : [][][][][]

OKSTAKA : [][][][][][]

RAULU : [][][][]

OJANG LUTEP TELANGZÜBA # 5515

ALIMAR RONGSEN DEN TSÜNGREMER TAOCHI
ASER TEMEIM KHENYONGI MEDEMDANGTSÜ MAKOK

TAN HOPTA ATEMA - KOMA SÜLA ?

Q. Nagaland angh R.N. Ravi ya melen nunga koma süla ?

Olong 20 shi nung September 10, 2021 tashi nung iba telangzuba ya onok dangi (e-mail - tiryimiyim@gmail.com) :
(SMS - 9856121232 / 9436072422) : (WhatsApp - 7005723372 / 8729995804) : (tiryimiyim.in) ajanga yokang. Telangzubatemi taruba Honibarnü adoktsütsü.



OFFICE OF THE KOHIMA ONGPANGKONG TELONGJEM KOHIMA, 797001 : NAGALAND

KONANG TETUSHI AGÜTSÜR

15th buba N.I. Jamir nungtem narokum " N.I. Jamir Academic Excellence Award" Trust ajanga Ao kin rongnungi 2021 küm NBSE HSLC nung tematiba jenjang ajangzüktetta takok angurtem nem agütsür.



Sp. Talinungsang Imchen 3rd Rank



Kr. Yimyatetla Longkumer 3rd Rank



Sp. Yangertemjen 4th Rank



Sp. Tiamaong Aier 9th Rank



Kr. Longtila Jamir 10th Rank



Kr. Talisangla Longkumer 10th Rank



Kr. Moanola Longchar 11th Rank



Sp. Limatongzuk Longkumer 11th Rank



Kr. Sentienla Yaden 11th Rank



Sp. Mongdikokba Walling 12th Rank



Sp. Aotushi Imsong 12th Rank



Kr. Ochien 12th Rank



Kr. Yashijungla 16th Rank



Kr. Wangshirenla 19th Rank



Sp. Imlijungba Aier 20th Rank

N.I. Jamir Trust ajanga konang tetushi angur ajaknem tepela tenungasang agütsür aser tarutsü anogotem asoshi nenok wadang takok ngudakjangma ta onok sarasadem.

(JONGPONGTOSHI) President

(BENDANGTOSHI KICHU) General Secretary

Pakistan-i tesempa o jembitsü atema UN sabang amshir: India

United Nations, Rongjui/ September 08 (Agencies):

Pakistan aija India-i, Pakistan linüki maneni pei linük nung dang masü saka arrtsü adenera kiralongrar; Pakistan-i tesempa o jembitsü atema United Nations sabang amshir, ta aitsü.

Mongolbarnü UN General Assembly nung 'Transformative role of the Culture of Peace: Promoting Resilience & Inclusion in Post-Covid Recovery' Culture of Peace senden nung jembidang India nung Permanent Mission to the UN First Secretary, Vidisha Maitra-i, "Culture of Peace ya senden balala nung jembitsü onük ka dang masü saka iba ya linüktem aser züngsem linüktem tsüngda tesendaktep atema inyaksü onük ka lir," ta metetdaksü.

"Tanüa Pakistan lenirtemi India anema tesempa o jembitsü atema UN sabang amshitsü meranga kuli asenoki nguogo. Parnoki (Pakistan) par linük nung dang masü saka arrtsü adenera rara adokdaksür. Onoki item tatalokba ajak aitsür," ta metetdaksü.

UN sabang nung Pakistan envoy to the UN, Munir Akram-i Jammu & Kashmir ken o süoka liasü aser Pakistan pusemba lenir, asür Syed Ali Shah Geelani indang süoka liasü. Pai jembiba onük ajakji forum indang onük masü saka India indang ang jembiba.

Maitra-isa, "Kiralongra ya maremzüktep aser rara ajanga adokdaksür; kiralongra ya yimsü aser sobaliba ajaki anemer. Kiralongra mapatem pusema kiralongrartemi yimsü

amshiba atema alimai teblemtsü akatsüla," ta ashi.

India-i maneni meimchir temeden aser democracy atema inyaksü, ta shia lai, United Nation nung tamangba yimsü dak sendakba onüktem nung o lemteptsüla, ta ashi.

Yaküm June ita nung India densema linük 12-i coronavirus atema 'Cross-Regional Statement on Infodemic' sponsor süa liasü.

"India ya tamangba yimsü, kin aser oshi-open balala jembir temeyoktep aika longjema litetba linük ka lir. India ya Hindu, Buddhist, Jainism aser Sikh yimsü tenzüka linük ka dang masü saka Islam, Judaism, Khristan aser Zoroastrianism tesayubatem proka tera ayangba linük ka lir," ta laisa metetdaksü.

SANGDONGER

Tanü asen Naga lima aser talisa Ao lima ajunga nung meyim mozü amshiba ajanga taküm jenjang raksa-a aoba den tekübok tia-i aluba ngua, NSCN/GPRN Ao Region, CAO office ajanga maneni lephsia metetdaksür.

Tanü 09/09/2021 nungi tenzüka, shibaisa iba meyim mozü amshiba putetdir, mesüra meyim mozü shibelenba metetdir, pa/ la tapet agi merenshitsu ta nenshia ozüing agütsür. Iba meyim mozü nokdangtsü asoshi Ao lima nung yimtsüng aser town nung yimsüsür tajungtem ajaki teka amteper meyim mozü anema inyaksü ayongzüker.

Sd/- Lidener Secretary Ao Region NSCN/GPRN

LAND FOR SALE Old Showuba Area

- i) 5 Pura (Rs.90 per Sq. ft.) (ii) 14 Pura (Rs. 110 per Sq.ft.) iii) Diphupar B 10,000 Sq.Ft (Rs. 350/- per Sq.ft)

For more details contace 9856603713

India nung ano nisung 37,875 dak covid putet aser 369 asü

New Delhi, September 08 (Agencies):

India nung ano nisung 37,875 dak coronavirus putet aser tang tashi nung linük nung nisung ajak senteper 3,30,96,718 dak iba tashidak putetogo, ta Bodhbarnep Union health ministry-i metetdaksü.

Tesüiba ghonda 24 tsüngda India nung coronavirus agi shiranger 369 süogo aser tang tashi nungbo linük nung iba tashidak agi shiranga asür ajak senteper 4,41,411 jungogo.

Tang India nung coronavirus agi teshirangdakpur 3,91,256 lir.

Tesüiba ghonda 24 tsüngda coronavirus agi shiranger 39,114 anepogo aser tang tashi nungbo iba tashidak agi shiranger ajak senteper 3,22,64,051 anepogo.

Taküm January 16 nü India nung coronavirus vaccination programme tenzüka sülen tang

tashi coronavirus vaccine dose 70,75,43,018 agütsüogo.

Ano tanga osang ka nung, Mumbai Mayor, Kishori Pednekar-i, coronavirus wave tasembuba tenzükogo, ta metetdakja liasü.

Kishori-i, "Nagpur nung nisung ajak dang kümdanga alitsü metetdaksüogo," ta metetdaksü.

Tesülen la indang office-i sangdong ka ajanga lai jembiba o metongshija, lai coronavirus wave tasembuba tenzükogo ta jembibaji Mumbai nung wave tasembuba tenzüksüsa lir ta metetdaksü.

Ano külen Kerala Chief Minister, Pinarayi Vijayan-i, state sorkari state nung aonung curfew aser Amongnü lockdown tenokdangba agientsü lemteptogo, ta metetdaksü.

Sorkari Taliban den jembir saka aluyimer denbo mejembir: Congress

New Delhi, September 08 (Agencies):

Tang India nung aluyimertemi aluyimba ozüing tasen asem anema maneni longkak aitba mapang nung Centre sorkar aija Congress-i, BJP sorkari Doha nung Taliban telok denbo senden menogo, ajisüaka aluyimertem denbo senden mena mejembiteter, ta aitsü.

Haryana kübok Karnal nung aluyimertemi sashia longkak aitba mapang nung Congress-isa longkak aiter aluyimertem dak tashiyim amshiba atema Haryana Chief Minister Manohar Lal Khattar-i CM menden nungi anentsüla, ta takhangba agütsü.

Congress party otongdar tongti, Randeep Surjewala-i, Centre sorkar aser state nung Khattar-i aniba sorkari aluyimertem jashidaktsür aser police nem tashiyim amshidaktsür, ta aitsü.

Osangbenertem den jembidang Surjewala-i, "Haryana nung BJP-JJP sorkari aluyimertem den mejembitetera chief minister Manohar Lal Khattar-i pa menden nungi anentsüla, ta Congress-i akhangar. Pa aser deputy chief minister Dushyant Chautala na yimsüsüba menden nung amentsü metemsü," ta

metetdaksü.

"Congress-isa Ato kilonser, Narendra Modi dang pa mapa ajak toktsür aluyimertem jaoka ken o jembitsüla, ta takhangba agütsür. Pai pa mezümeüküm toktsür aluyimertem den jembitsüla aser tanüsa aluyimba dak sendakba tanak ozüing asempronglaji agientsüla," ta paisa ashi.


Surjewala-i, Modi sorkar aser Haryana nung BJP sorkar nati aluyimertem anema asalentong yanglur, aser iba rara ya aluyimertem aser police tem tsüngda rara ka kümdaksür, ta ashi.

"Modi aser Khattar, nenoki Doha tashi oa Taliban telok denbo jembiteter, ajisüaka kechiba nenoki Ato kilonser aliba tesem nungi kilometer 20 dang pilar aliba Delhi arrtsüleni oa aluyimertem denbo mejembiteter. Nenoki parnok Delhi telungi aitsü memelar. Ato kilonseri telangzüba karbo agütsütsü asü?" ta pai asüngdang.

Congress lenirisa August 28 nü police-i ajok agi aluyimertem dak azükba sülen aluyimer, Sushil Kaja asüba atema nisung tepsetba ken o benoktsüla aser asür kibong nem senotsü teyari agütsütsüla, ta takhangba agütsü.



September 08, 2021 nü Ranchi nung Jharkhand Assembly senden agiba mapang BJP züngsemtemi Chief Minister Hemant Soren aser Assembly Speaker Rabindra Nath Mahato na anema longkak aita assembly-i aoba mapang police-i parnok dak tzu khaloktsüba noksa nung angur. Chief Minister aser Speaker nati Muslim nung sarasadem 'Namaz' agitsü atema Jharkhand Assembly House nung takdanga ka lemzüksüba anema BJP-i longkak aiter.



Paris, France nung aliba Palace of Justice kima security forces tem nokdaka aliba noksa nung angur. 2015 kum Islamic State teloki Paris nung lendong agüja nisung 130 tepsetba aser noklang aika yirutsüba maparen nung tai tonglokja alir nisung 20 anema ken o jembu tenzükogo. Ken o ya Bodhbarnü nungi jembu tenzükoger aser iba ken o nung aitsürtem timba taküm tepiyong tepuokdak ayutsü.

Arctic training exercise mapang Russian emergencies minister asü

Moscow, Rongjui/Sept. 08 (Agencies): Arctic nung aliba Norilsk yimti nung training exercise agidang noksa tangoker ka tsükba kumzüksü meranga Russian Emergencies Minister Yevgeny Zinichev longren nungi pongzükba sülen asü, ta ketdangsürtemi ashi.

"Emergency ministry nung tekolakba, Yevgeny Zinichev ya Arctic nung inter-agency drills akadang nisung ka takum kumzükang tia makai asü," ta ministry ajanga sangdong ka nung ashi.

Sorkari senotsü teyari agütsüba news outlet, RT indang editor-in-chief, Margarita Simonyan-i ashiba agi, arishi kum 55 tain minister ya longren nungi cameraman ka tsükba kumzüksü merangdang asü.

"Pa aser cameraman ya longrenpan nung nokdaka liasü. Cameraman ya ajuchir tsük... Nisung shingai memetetba mapang tsüka alisang kumzüksü mechi Zinichev ya pongzük aser long nung akoseta asü," ta lai Twitter nung ashi.

Ajisüka asüba ya kodang atalokar tejangja memetet. Minister asüba indang Tir Vladimir Putin nem metetdaksüogo, ta Kremlin odongtar Dmitry Peskov-i osangbener dang ashi.

Taoba mapang Zinichev ya USSR indang KGB security service nung züngsem ka liasü aser pa ya 2006 aser 2015 tsüngta Putin indang security nung inyakba sülen temaba jenjangi ajungketa liasü.

Pa ya Kaliningrad region nunga acting governor ka ama mapang tatsüka inyaka liasü aser iba sülen Federal Security Service (FSB) indang deputy head inyaka liasü.

Zinichev ya Emergencies ministry indang tekolakba ama 2018 kum May ita shima liasü. Pa ya Russia indang Security Council nunga züngsem liasü.

Emergencies ministry tekolakba ama pa ya cabinet mapa tongti ka bena liasü, aser pai alimar yimya aser nisung-i yangluba timtem aser timtem tensa balala nung telangzüba agüja yaritepa arua liasü.

Pa dena aliba anogo ananü drills ya Norilsk densema Arctic yimti aika nung Mongulbarnü tenzük, aser yangi nisung 6,000 dak tema shilem agir.

Taliban-i Kabul nung nung osangbener pongu apu

Kabul, Rongjui/Sept. 08 (Agencies): Taliban-i Kabul nung aliba osangkaket, Etilaatroz nung inyaker Afghan nung osangbener pongu puogo, ta Afghanistan network Tolo News ajanga Bodhbarnü Twitter nung metetdaksü. Parnok apuba osang ya iba osangkaket indang editor-in-chief, Zaki Daryabi-i agütsü, ta ashi.

Taliban-i alima nung lokti tentet balala dang osangbener temeden akumtsübutüsü nangzükaka, aser tetsür anema par tangatetba tali liaka Afghan nung aikati tamang makateter.

Afghanistan nung Mullah Mohammad Hasan Akhund-i anir caretaker government tasen ka Taliban-i sangdonger anogo ka dang lir osangbener nisung pongu apuba osang ya arur.

Taliban indang telemtetba balala agiba tashi tait tentet 'Rehbari Shura' nung tekolakba, Mullah Hasan ya Acting Prime Minister alitsü aser Mullah Abdul Ghani Baradar ya pa indang deputy inyaksü, ta Taliban odongtar Zabihullah Mujahid-i Kabul nungi osangbener senden ka nung ashi.

Taliban Supreme Leader Mawlawi Hibatullah Akhundzada-i sorkar dang Sharia ozüng amshitsü ashi, ta sangdong ka ajanga ashi. Taliban-i kidanger linüktem aser alima ajunga den tesendaktep takhang aser tajung aginer, tangatetep nung kati ka akumtsüba aser yamaji Islamic ozüng aser linük yimya nung timtem magütsüba international laws aser treaties akumtsübutüsü, ta ashi.

Ano Mongulbarnü Kabul nung Pakistan anema longkak aitba osang abenba mapang Tolo News nungi osangbener Waheed Ahmadi ya ghonda asem shi pua ayu. Taliban-i Ahmadi den ano danga osangbener ter dak tema pua liasü.

Parnoki taoba mapang 1996 nungi 2001 tashi yimsü asüdang, Taliban-i broadcast entertainment timba nokdang aser media atema lenmang kangabo meliasü.

Alima ajunga nung osangbener asadanga telok, Reporters Without Borders ajanga ashiba agi, Taliban-i 2021 kum August ita Afghanistan agiba sülen nija meyong media network 100 shi inyakim shibangtsüogo.

Mexico mozüki ka nung tzümetsüng adoka nisung 17 asü

Mexico City, Rongjui/Sept. 08 (Agencies): Mexico linük tiyonglen Hidalgo state nung tzünglu kanga sashia aruba ajanga River Tula ayongkum nungi tzi nungteta adoka mozüki ka metsüngbang aser COVID-

19 tashidak agi menepa alir timba sür nisung 17 asü, ta ketdangsürtemi Mongulbarnü ashi.

Tula jila nung aliba mozü kidang nungi shiranger 40 dak tema emergency service worker temi anizükter ao aser iba tzümetsüng yagi ki 2,000 shi raksatsü amai asadangteta lir, ta Mexico sorkari sangdong ka nung ashi.

Iba lendong nung asür nisung 17 nungi par 15 mesüra 16 bo COVID-19 agi shiranga liasü, ta Hidalgo Governor Omar Fayad-i osangbener dang ashi. Anogo aika tzünglu kanga sashia aruba sülen tzümetsüng agi mozüki nung electricity raksatsüba sülen nisung ya asü, ta osang ajanga ashir.

Fayad ajanga social media nung noksa prokshiba nung nurse temi mozüki nung shiranger kumzüksü meranga yipten nungshiba nguogo. Nurse karbo tzi ya temokok tashi atsünga atur liasü.

Shiranger kar speedboats nungi anizükter aoba video karbo nguogo.

Tir Andres Manuel Lopez Obrador-i Twitter nung nüburttem dang kinunger mesüra medemer mesüra tenemlen bushia aotsü ajungshia liasü. "Valley of Mexico nung tzünglu kanga sashia aruogo aser ano arutsü," ta pai ashi.

Indonesia tepuokdak mi adoka nisung 41 asü

Jakarta, Rongjui/Sept. 08 (Agencies): Indonesia tepuokdak ka nung Bodhbarnep yangji alirtem timba amoa orr lia mi adoka nisung 41 asü aser ano aika yiru, ta ketdangsürtemi ashir.

Temesepba mozü dak sendakba nung tepuokdak yua alirtem timba alidak block ka nung mi ya jangrua liasü aser mibener temi anepdang 3:00 ako (par mapang) meta remsepteta lendong ajurua alirtem anizükter ao.

Iba tepuokdak tesem nung mi jangrua aser ki nungi mokozü temelem adokba television nunga sayua liasü.

"Iba tesem nung nisung 40 asü aser ka mozü kidangi anir aoba mapang asü. Nisung ti kangasa mejungi yiru aser 31 tera yirua liasü," ta Indonesia indang Justice minister Yasonna Laoly-i ashi.

Jakarta police tekolakba Fadil Imran-ia osangbener dang nisung 72 terara yirua

liasü, ta ashi. Linük yimtiba, Jakarta tezülen Tangerang Penitentiary nung iba lendong atalokba indang ketdangsürtemi bushisüngdanga mapang lir, saka electrical timtem kar ajanga mi ya adok südi, ta temolung melemi lir.

"Tang tashinung mi ya shirt circuit ka nungi adok amai temolung melemi lir," ta Imran-i ashi.

Iba tepuokdak ya 1972 nung yangluba sülen electrical system ya yanglushia mali, ta Laoly-i ashi.

"Mi ya kanga kera jangrua ao aser cells kar lapoktsübo mapang meliasü... Tanükertemi metetba mapang mi ya tesem balala nung jangrua liasü aser yangji asürtem ya angu," ta Laoly-i ashi.

Police temi asürtem jangja tenzükogo saka tasümgang karbo kanga mejungi rongsar

alinung DNA tendangtsüsa akumtsü, ta pai ashi.

Asürtem rongnung South Africa nung ka aser Portuguese nung ka dena liasü, ta Laoly-i ashi saka parnok ya kechi tai nung tepuokdak yua liasüar ajibo mashi.

Tena tasümgang bener aotsü mesüra aremtsü atema Indonesia indang foreign ministry aser nungdakba embassy tem den osang agitepba mapang lir, ta pai ashi.

Asürtem rongnung ka kiralongra inyakba nung aika liasü, ka nisung tepsetba nung aser kar temesepba mozü amshiba nung aija liasü.

"Asür kinungertem den ni asükhu lemsateper, aser yamai tanaben matalokdaksüner," ta Laoly-i ashi.

Iba tepuokdak nisung 2,000 dak tema yua liasü ta penitentiary department

indang website nung sayur, koba lezmüksüba dang nungi asemsü agi timba liasü.

Mi adokdak ya shidakba agibo nisung 40 dang ayutsü liasü saka yangji nisung 120 yua liasü, ta penitentiary directorate general indang odongtar Rika Aprianti-i Metro TV dang ashi.

Indonesia tepuokdak nisung tali ayuba aser murekmeju masüba ya tang tasen masü, kong nisung 270,000 shi tepuokdak yua lir aser tepuokdak tesem rakpoka ajenba mapang shia ataloker.

2019 kum Riau province, Sumatra nung tepuokdak ka nung rongrong adoka aser mi adokba sülen yangji tepuokdak alir nisung 100 shi jena liasü.

COVID-19 tashidak nungi tepuokdak alir kumzüksü mechi taoba kum April ita Indonesia nung tepuokdak alir nisung 29,000 shi chioka liasü.

62buba FAC Foundation Day cum tetushi agütsüba sentong agiogo



Dimapur, Rongjui/September 8 (TYO): 62buba Fazl Ali College Foundation Day den repsema takok angurtem nem tetushi agütsüba sentong ka Fazl Ali College Auditorium nung September 8 nü 12:00 ako nungi tenzüka agiogo. Iba sentong nung HoD tem, College Student Executive tem aser tetushi agizükertem, tsürapurtem aser non-teaching staff tem dena liasü. Iba sentong ya Education Department, Asstt. Professor, Dr. Temjennaro Jamir lenisüba nung agi. Vice-Principal R. Arenla Aier-i, 1959 küm September 8 nü college amenokba aser iba sülen college inyaksangshia aruba aser nükjidong aser college omen: Academia NulliSecundus indang lemsatep. Laisa college-i timtem tekangshia ajangshibatem aser maparen balala merangdanga inyakba aser kaket shisatsü agütsüba nung shilem aser kasa mapang nung taküm jenjang tajung yanglur alirtem atema nükrangdong ka akümiba indang lemsatep. HoD, Sociology Department & Convenor Award Committee Dr. Adangla-i, taoba Principal, Kuholi Chishi-i, subject balala nung SGPA temaba angur kaketshirtem nem iba tetushi

agütsüsü apiteta amenokba indang lemsatep. Mapa nungi anener aliba faculty temi senotsü teyari agütsüba aser memorial Award tem jenjang balala nung kaketshirtem nem agütsüogo. Temaba jenjang nung takok anguba kaketshirtem nem senpet aser kuli kaket agüja liasü. Maneni Zoology Department, Asstt. Professor Imlinungla-i, tetushi agizükba kaketshirtem aser college nungi takok ngur aoertem atema sarasademja liasü. **2020 atema tetushi agizükertem**
 * **CAAT Award**
 1) Chongkhem (Chemistry) - 10,000/-
 * **Late Dr.Longrizung Award**
 1) AyanlaYimchunger (History)- 5000/-
 2) Puspa Maya Pradhan (Botany)-5000/-
 * **Linnaeus Award**
 1) Puspa Maya Pradhan (Botany)- 3000/-
 * **Dr. A.K Choudhary Award**
 1) Bendangsangla (Maths)- 5000/-
 * **EU of the Year 2020 Award**
 1) Manshang (Botany)- 5000/-
 * **University Topper**
 1) Akumnaro (Geography)- 5000/-
 2) Kilangienla Longkumer

(Maths)- 5000/-
 * **Department of Education Excellence Award for the topper in Education**
 1) Takosenla- 2000/-
2021 atema tetushi agizükertem
 * **CAAT Award**
 1) Mongshai M (Pol. Science)- 10,000/-
 * **Late Dr.Longrizung Award**
 3) Anisha Gharti (Math)- 5000/-
 4) Yangtsapi Sangtam (English)- 5000/-
 * **Linnaeus Award**
 2) Akangkokla (Botany)-3000/-
 * **Dr. A.K Choudhary Award**
 2) Anisha Gharti (Math)- 5000/-
 * **EU of the Year 2020 Award**
 2) Tosangla (Sociology)- 5000/-
 * **University Topper**
 3) Teihwang (Geography)- 5000/-
 * **Dr.Watimongla Pongener Award for the topper in English**
 1) Yangtsapi Sangtam- 5000/-
 * **Department of Education Excellence Award for the topper in Education**
 1) I Moasenla Jamir- 2000/-
 * **Department of Sociology Award for the subject topper in Sociology Major amongst the sociology students**
 1) Tosangla - 2000/-

MENUNGRA BILEMTETER

Asür Imsuakum Jamir (Chuchuyimlang)
 ASU : 09.09.2020

Na iba akümüli wadang temer küm ka tanü junga aruaka, onok mulungjang nung asenok külemi aliba anogo aser mapang tajungtem teti lir. Tanü na bilemteta kinungertemi sarasadema amonger.

~ Temeim Tsürabur, Adianu aser Kinungertem.



Mulungnen O

Yisu asü aser shia aru ta asenoki amanger. Anungji yamaji Yisu dak amanga asürtema Tsüngremi Yisu den tanaben anir arutsü. - 1 Tesalonika 4:14

Onoki kodanga mamatetba Asür **Mrs. SASHISANGLA (KHAR)** la shirangba anogo nungi tasüba anogo tashi kija, kibong, kiyonger, Arogo, yimten, lokti balala shirnokisa, wara tesashi liaka nübü, sarasadem, rongsen aser shisatsü agi aochia temeim aser mapa tajung sayuogo, laer chirnür, semchirtemi (105) nenok ajak dang kanga pelaba lemsateper. Nenok tangi arua meshitetaka Tsüngremi nenok ajak mojangma ta onok sarasadem.



Asoba: 10.09.1923
 Asüba: 05.09.2021

Temeim chirnur, semchir aser anükapang.

OFFICE OF THE
 DIMAPUR AREA CHUCHUYIMLANG SENSO TELONGJEM
 DIMAPUR-797112, NAGALAND.


TENÜNGSANG AGÜTSÜR

Wt.Aienla Senti-i School Education department nung Deputy Director jenjang tongtetba takok aser temoatsü asoshi Dimapur Area Chuchuyimlang Senso Telongjemi la nem tenüngsang agütsür.

Nübor tenzüksü asoshi Tsüngremi la taküm aser sempet maneni mojangma.

Sd/-
I.Sungit
 President.

Sd/-
Nükshitemjen
 Asst. Gen. Secretary.



ANTENATAL CARE

Kechi südir süaka pezübenbo temang tendangtsüla, kong blood pressure, temang tozük tendangba aser Tetanus toxoid injection ana densema lir. Tanur MOZÜKIDANG asotsüla. Anema aliba tetsü kati dang anema aliba tanur sotettsü ta bilemtettsüla.



Mashisa aliba tetsütemi parnok tenüng Anganwadi mesera Sub Health Centre nung züngoksemtsüla



Devendra aser Sarita na NSA Selection Committee nung züngoksemogo



Rongjui/September 8, 2021 (Agencies): Paralympic nung medal asem tashi nguer aliba javelin thrower Devendra Jhajharia, taoba mapang cricket asayar Venkatesh Prasad aser ex-world champion boxer L Sarita Devi nung taküm National Sports Awards atema selection committee nung züngoksemogo.

Iba committee mendenbuba asütsü atema retired Supreme Court judge Justice

US Open 2021: Medvedev & Leylah na semi-finals-i iogo

Rongjui/September 8, 2021 (Agencies): Russia nung asayar Daniil Medvedev taküm agi küm asem buba atonga US Open semi-final-i iogo. Kasa mapang nung Arishi küm 19 tain Canada tsür Leylah Fernandez-ia Svitolina koka tang mezüngbuba Grand Slam semifinal ka tongtetogo.

Mongolbarnü quarter final asaya nung Medvedev-i Dutch nung asayar Botic Van de Zandschulp 6-3, 6-0, 4-6, 7-5 agi koka liasü.

"Taoba mapang anaben tashi tamakok anguba dang nungi tang tera tajungba asayaa jenjang talila ka aginer, koba ajak dang tasaktiba asütsü," ta Medvedev-i ashi, shiba mezüngbuba Grand Slam akoktsü atema meranga asayadar.

Arishi küm 25 tain Moscow nungi asayar ya 2019 küm US Open runner-up liasü aser taküm Australian Open final nunga Novak Djokovic-i tsükdaktsü, shiba US Open koka küm ka nung Grand Salm pezüprongla akoktsü merangdar.

Medvedev-i semifinal nung takok ngura pa final nung Djokovic den asayatsü akok.

"Ni pa atema mebiler kechiyong asayar mashi kati mashi ka akoktsü akok. Pa Final tongra aser nia final tongra ni

angutsüpur shimtsü atema iba committee ya anogo ishika tsüngda ajuruteptsü.

Taküm Olympic aser Paralympic Games nung shilem agiba asadangtsü atema sorkari iba naroküm magütsü atatsü telemtetba agi. Asayamung anaprongla nung India nung asayartemi otsü tasen yanglua liasü. Olympics nung India nung asayartemi medal tenet aser Paralympics nung gold pongu densema medal 19 ngua liasü.

Award ajak rongnungi tematibaji Khel Ratna award lir, koba taküm Rajiv Gandhi Khel Ratna ta jaya aliba Dhyana Chand Khel Ratna ta melentsüogo. Iba sülen Arjuna award asütsü. Khel Ratna award den külemi senpet sen lakh 25 agütsütsü aser Arjuna angurtem nem senpet sen lakh 15 agütsütsü.

Coach tema atema Dronacharya award agütsütsü. Maneni National Sports Awards nung Lifetime Achievement award; Rahstriya Khel Protsahan Puruskar aser 2021 küm atema Maulana Abul Kalam Azad (MAKA) trophy densema lir. Selection committee nungsa hockey coach Baldev Singh, Sports Authority of India Director General Sandip Pradhan, aser osangbener tejen Vijay Lokapally aser Vikrant Gupta nung densema lir.

India aser England na T20I asem aser ODI asem asayatsü

London, Rongjui/September 8 (Agencies): Indian cricket team taruba küm July ita England den white-ball asaya trok asayatsü, ta England and Wales Cricket Board-i 2022 atema international home fixtures sayba mapang metetdaksü.

Indian team tang England den Test asaya pongu asayadar aser tatembangbuba Test September 10 nü tenzüksü.

Ajisüaka taoba kümtem ama masü India red aser white ball series tem piladaktsüogo, kechiyong COVID-19 wara pokteter aliba ajanga mapang ka nung linük nungi pilar mapang talangka bendanglen senzütsüsa akümer.

England tebur team July ita India den asayaba sülen South Africa den asayatsü.

ECB-i sayaba mapanglem nung India aser England na July 1 nü Old Trafford nung mezüngbuba T20 International asayatsü aser iba sülen Trent

ICC Test rankings: Bumrah jenjang tekububai tuogo



Rongjui/September 8, 2021 (Agencies): England den tanga asayaa aliba Test asayamung Test pezübububung nung kanga junga asayaba sülen tawa sayaba ICC Test rankings nung bowler tem rongnung India nung pacer Jasprit Bumrah jenjang tekububai tuogo.

Test asaya pezübububung Bumrah-i Ollie Pope aser Jonny Bairstow na indang tongtibang wicket ana agi India team temaba jenjang nung toktsü aser India team-i iba asaya koka 2-1 agi tejakdang akümba nung teyari agüja liasü. Iba asayamung nung tatembangbub test Hokolbarnü Manchester nung asayatsü.

Batsmen tem rongnung Shardul Thakur-i half century ana yangluba sülen pa jenjang 59bubai tuogo.

Maneni pa bowler tem rongnunga jenjang 49buba nung lir. Pai iba asaya nung wicket pezü agia liasü.

Bowler tem rongnung Australia nung bowler Pat Cummins temaba jenjang nung lir aser England den Test asaya nung khen danga asayatsü atema maongka monguaka Ashwin maneni tanabuba jenjang nung lir.

Batsmen tem rongnung England captain Joe Root maneni temaba jenjang nung lir aser top-10 nung temelenshi kecha mali.

Rohit Sharma aser Virat Kohli na jenjang pongububa aser trokbuba nung lir. Test asaya pezübububung Rohit-i run 127 yangluba sülen pa Kohli dang nungi rating points 30 agi timba kümogo.

All-rounders' rankings nung Ashwin jenjang ka asepzüka alua jenjang pongububa nung lir aser Ravindra Jadeja maneni tasembuba nung lir.

All-rounder tem rongnung West Indies nung asayar Jason Holder temaba jenjang nung lir.

Bridge (July 3) aser Ageas Bowl (July 6) nung tanungba asaya ana asayatsü.

ODI asayamung ya Edgbaston (July 9) nung asayaa tenzüksü aser iba sülen Oval (July 12) aser Lord's (July 14) nung asayatsü.

England tebur team 2022 küm world champions New Zealand den test asaya asem asayaa kidang asaya tenzüksü.

Joe Root-i aniba Test team ya Black Caps den Lord's nung June 2 nü mezüngbuba Test asayatsü aser iba sülen Trent Bridge (10-14 June) aser Emerald Headingley (23-27 June) nung asayatsü.

ECB Chief Executive Officer, Tom Harrison-i ashiba agi, "taküm lemluwa cricket jangradema asayaogo aser asaya repringtsüpurtem sung

adenshiba ngua kanga pelar."

"Taruba küm temaba jenjang nung asayaba international touring team asem England nung arua asayatsü. Mezüng World Test champions New Zealand den Test LV= Insurance Series asayatsü.

"Maneni South Africa den test asem densema asayamung ka masaya tsüngda India den white-ball series ana asayatsü yongyaa atar," ta pai ashi.

England v India -- T20 Series 2022 mapanglem:

Jul 1, 2022 - Emirates Old Trafford
Jul 3 2022 - Trent Bridge
Jul 6 2022 - Ageas Bowl
England v India -- ODI Series:
Jul 9, 2022 - Edgbaston
Jul 12, 2022 - Kia Oval
Jul 14 2022 - Lord's.

BILEMDANGANG

"Tazükba kübok melitetertemi alima raksar."